

Ilinniagaqarnersiutit pillugit Namminersorlutik Oqartussat nalunaarutaat

Ilinniagaqarnersiutit pillugit Inatsisartut inatsisaat nr. 12, 22. november 2011-meersumi § 2, imm. 5, § 5, § 14, imm. 4, § 28, imm. 2, § 34, imm. 5 aamma § 35, imm. 2 aamma kalaallit ilinniagaqartut kattuffinut tusarniaareernikkut aalajangerneqarpoq:

Kapitali 1

Nassuiaatit

§ 1. Ilinniagaqarnissamut piareersarluni ilinniarnertit tassaapput:

- 1) Ilinniagaqarnissamut piareersarluni ilinniarnertit meeqqat atuarfianni inaarutaasumik misilitsinnermit qaffasinnerusumik inissisimasut.
- 2) Ilinniarnertuunngorniarnertit, ilinniarnertuunngorniarnertit illassutitut ilinniarnertit aamma piareersarluni pikkorissarnertit.

§ 2. Inuutissarsiutinut ilinniartitaanertut paasineqassaaq ilinniartitsineq ilinniarnertit pineqartumi, ilinniartitsinnermut pilersaarut naapertorlugu ilinniagaq inuutissarsiorsinnaanermut suliamik ilinniagaqarsimasutut pisinnaatitaaffiliisoq, nalinginnaasumillu ukiut marluk sinnerlugit sivisussuseqartoq.

Imm. 2. Inuutissarsiutinut ilinniartitsinnermut sivikitsutut paasineqassaaq inuutissarsiutinut ilinniartitsineq nalinginnaasumik ukiunik marlunnik imaluunniit taakkunannga sivikinnerusumik sivisussuseqartoq, aammalu ilinniakkamut pineqartumut ilinniartitsinnermut pilersaarutaasoq naapertorlugu, suliamik ilinniagaqarsimasutut ilinniagaqarnerup naleqqatiginngisaa.

§ 3. Ingerlaqqiffusumik ilinniarnertit tassaavoq ilinniarnertit ilinniarnertuunngorniarnertit ilinniarnertit angusisimanissamik piumasaqaateqarfusoq, tassunga ilanngullugit ilinniarnertuunngorniarnertit ilinniarnertit immikkut aqqissuunneqartut, imaluunniit inuutissarsiummik ilinniagaq.

§ 4. Timersornermut immikkut piginnaanillit timersortartutullu piukkunnassuseqartut tassaapput ilinniagaqartut Elite Sport Greenlandimit aammalu timersuutinut kattuffinnit innersuussutaareerlutik Ilinniagaqarnersiuteqarnermut Naalakkersuisoqarfinnit timersornermut immikkut piginnaanillit timersortartutullu piukkunnassuseqartut ilinniagaqartussatut akuerineqartut. Kalaallit Nunaanni Timersoqatigiit Kattuffiata timersuutit namminneq timersuutiminnut kattuffeqanngitsut sinniisuuffigisinaavai.

§ 5. Ilitersuisoq tassaavoq ilinniarfimmi ilinniagaqarnermut tunngatillugu ilitersuisartoq, ilinniarfimmi ilinniartitsisoq imaluunniit ilinniarfimmi ilitersuineramik suliaqartut allat, imaluunniit Danmarkimi Kalaallit Illuutaasa ilaanni ilinniagaqarnermut ilitersuisartoq. Aammattaaq Ilinniagaqarnersiuteqarnermut Naalakkersuisoqarfik aqutissiuissinnaavoq.

§ 6. Katissimanermut assingusumik aalajangersimasumik inooqatigiinneq sivikinnerpaamik ukiumik ataatsimik sivilissuseqartoq, najugaqarnermut uppersaatsikkut uppersarneqartoq katissimanermut naligiissinneqassaaq.

§ 7. Ilaqutariit qaniginerpaasat tassaapput nammineq qitornarisat, katissimallugu aapparisaq, angajoqqaat, qatanngutit aamma aataakkut aanaakkulluunniit, imaluunniit inuit ilinniagaqartumut ilaqutariittut qanittutut inissisimanermikkut taakkununga nallersuunneqarsinnaasut.

Kapitali 2

Ataatsimut aalajangersakkat

Nalinginnaasumik piumasaqaatit

§ 8. Ilinniagaqarnersiuteqarnermut Naalakkersuisoqarfik tamanna pillugu qinnuteqartoqareerneratigut danskisut innuttaassuseqarnissamik piumasaqaammik sanioqqutsinissaq pillugu immikkut akuersisinnaavoq, tak. ilinniagaqarnersiutit pillugit Inatsisartut inatsisaat, ilinniagaqarniartoq ilaqutariinnikkut Kalaallit Nunaannut immikkut attaveqarpat, assersuutigalugu katissimaneq aqutigalugu, imaluunniit ilinniagaqarniartoq Kalaallit Nunaanni angajoqqaarpat.

§ 9. Ilinniagaqartut ilinniagaqarnermik unitsitsigallartut, tassunga ilanngullugit erninermut atatillugu ilinniarnermik unitsitsigallartut, taamaattoq tak. § 33, imm. 1, nr. 8, ilinniagaqarnersiuteqarsinnaatitaanngillat. Ilinniagaqartulli erninerminnut atatillugu sulingiffeqartut immikkut tapiissutinik pisinnaatitaapput.

Imm. 2. Ilinniagaqartut qiortakkamik imaluunniit stipendianik atuiunnaarallartut, piffissani taakkununga atuiunnaarallarfinninni immikkut tapiissutinik imaluunniit nunatta karsianit aningaasalersorneqartunik ilinniarnermi attartortakkanik pisartagaqarsinnaanngillat, tak. kapitalit 6 aamma 7.

Imm. 3. Ilinniagaqarniartut, tunniunneqartartut kapitalini 6-imi aamma 7-imi pineqartut pillugit qinnuteqannginnertik sioqqullugu, qaammatini 3-ni stipendianik ataavartumik pisartagaqarsimanngitsut, imaluunniit immikkut tapiissutisinnaanatillu nunatta karsianit aningaasalersorneqartunik ilinniarnermi attartorsinnaatitaanngillat. Taamaattoq tamanna ilinniarnernup aallartinnerani imaluunniit ilinniarnernup qaammataani siullerni 3-ni atuutinngilaq.

Imm. 4. Ilinniagaqartunut Naalagaaffiup ilinniagaqarnersiuteqartitsineranit stipendianik pisartagaqartunut, kapitalit 6 aamma 7 naapertorlugit immikkut tapiissuteqartitsisoqarsinnaavoq aamma nunatta karsianit aningaasalersorneqartunik ilinniarnermi attartortitsisoqarsinnaavoq, taamaattoq tak. § 52, naggatit aappaat, nalunaarut una naapertorlugu aammalu ilinniagaqarnersiutit pillugit Inatsisartut inatsisaat naapertorlugu ilinniagaqarnersiuteqarsinnaanermut piumasaqaatinik naammassinnissimappata.

Ilinniagaqarnermik ingerlatsineq

§ 10. Ilinniagaqarnermik ingerlatsineq imatut paasineqassaaq, ilinniartup ilinniagaqarnerup ingerlanissaanut malittarisassat naapertorlugit ilinniartitsinermut pinngitsoorani peqataaffiusussamut aamma misilitsinnernut soraarummeernernullu piumasarineqartunut peqataanera, suliassiissutitik tunniussisarnera, takkuttussaataitanermik piumasaqaammik malinninnera il.il., imaluunniit misilitsinnerni soraarummeernernilu peqataannginnissamik nalunaarnerup takkutinngitsoornerulluunniit ilinniarfimmit akuerineqareernikkut pisananera.

Imm. 2. Ilinniagaqartoq uppersarneraqartumik piffissami sivisuumi annertuumik napparsimasoq, ilinniagaqartutut isigineqartarpoq, ilinniagaqartoq misilitsinnissanut soraarummeernissanullu nalunaarutigineqarsimappat.

Imm. 3. Ilinniagaqarnermi ilinniarfimmut pinngitsoorani takkuttariaqarfunngitsumi ilinniarnermi ilinniartuq qaammatit aqqaneq marluk sinnerlugit kinguaattoorsimanngippat ilinniagaqartutut isigineqassaaq. Aningaasat ilinniarnermi tunniunneqartartut imaluunniit qiortakkat ilinniagaqarnermut atatillugu tunniunneqarsimasut akornanni assigiinngissutaasoq kinguaattoorneruvoq, taamatullu ilinniagaqarnermut maleruagassat atuuttut najoqqutaralugit ilinniagaqarnermi siuariartorneq qaammatinut uuttorneqartarluni, taamaattorli tak. § 58, imm. 3, oqaaseqatigiit aappaat. Ilinniagaqartup ilinniarnermi qaammatini aalajangersimasuni amerlassusilinni stipendianik tunniunneqartartunik pisarnissamut qiortakkanillu pissarsisinnaatitaalluni sivitsorsimappagu stipendiat imaluunniit qiortakkat naatsorsuinermit ilanngunneqassanngillat.

Imm. 4. Imm. 1-imi aalajangersakkat timersornermik immikkut piginnaanilinnut timersortartutullu piukkunnassuseqartunut atuutinngillat. Ilinniagaqartoq timersornermik immikkut piginnaanilinnut timersortartutullu piukkunnassuseqartunut piumasaqaatinik naammassinnissinnaajunnaarpat, Elite Sport Greenlandip ingerlaannaq Ilinniagaqarnermiuteqarnermut Naalakkersuisoqarfik nalunaarfigissavaa.

Imm. 5 Ilinniagaqarnermiuteqarnermut Naalakkersuisoqarfiup tamanna pillugu qinnuteqarnerup naapertorlugu immikkut akuersissutigisinnavaa qaammatinik 12-inik kinguartoorsinnaaneq pillugu aalajangersakkap imm. 3, oqaaseqatigiinni siullerniittup saneqqunneqarsinnaanera, kandidatinngorniarluni ilinniagaqartoq qiorsinernik sulit atugassaqqarpas, tak. § 21, ilinniarfiullu uppersarnerapagu ilinniagaqartoq sulit ilinniakkamik ingerlatsisuuvoq.

§ 11. Ilinniagaqartup ilinniarnerminik ingerlatsinera ilinniarfiup aamma Kalaallit Illuutaasa ingerlaavartumik nakkutigissavaat, ilinniagaqartullu ilinniarnermik ingerlatsinissaq pillugu piumasaqaatinik piviusunngortitsineranut tunngatillugu aalajangiisassallutik, tak. § 10.

Kapitali 3

Ilinniagaqarnermiutit suuneri annertussusaallu

Stipendiat

§ 12. Aningaasanut inatsimmi annertussutsit aalajangersarneqarsimasut naapertorlugit makkununga stipendiaqartitsisoqartarpoq:

1) Ilinniagaqarnissamut piareersaataasumik Kalaallit Nunaanni ilinniagaqartunut 18-it inorlugit

ukiulinnut.

2) Ilinniagaqarnissamut piareersaataasumik Kalaallit Nunaanni ilinniagaqartunut 18-ileereersimasunut.

3) Kalaallit Nunaanni inuutissarsiummik ilinniagaqartunut sulisitsisumit

anigaasarsiaqartinneqanngitsunut, tamatumani aamma sulisitsisup ilinniartumik soraarsitsinerani, soraarsitsineq ilinniartumut tutsinneqarsinnaanngippat, tak. imm. 2.

4) Kalaallit Nunaanni ingerlaqqiffusumik ilinniagaqartunut.

5) Kalaallit Nunaata Danmarkillu avataanni ilinniartut ilinniagaqartunut.

6) Ilinniagaqartunut 20-it inorlugit ukiulinnut Danmarkimi ilinniarnertuunngorniartut aamma inuutissarsiummik ilinniartut ilinniagaqartunut.

7) Ilinniagaqartunut Danmarkimi ilinniarnertuunngorniartut ilassutitut ilinniarnertuunngorniartut ilinniartitsissutit ataasiakkaat, tak. § 15.

8) Ilinniagaqartunut Danmarkimi inuutissarsiummik ilinniagaqartunut, tunngaviummik ilinniakkamik ingerlatereermik kingorna, qaammatit marluk angullugit sivissusiliummik sungiusarlutik sulilernissaminnik imaluunniit ilinniartutit sungiusarlutik sungiusarlutik sulilernissaminnik utaqqisunut.

9) Ilinniagaqartut Majoriami ilinniakkamik ingerlatsisut.

10) Ilinniartut Danmarkimi immikkut ittumik atugassarititaasut naapertorlugit ilinniartusunut.

Imm. 2. Soraarsitsineq ilinniartumut tutsinneqarsinnaanngilaq, ima pisoqarpat:

1) soraarsitsineq pivusorsiorummik tunngavilersugaanngippat, imaluunniit inatsisitigut tunngavissamik pingaaruteqartunik amigaateqarpat, imaluunniit

2) soraarsitsineq sungiusarluni suliffusup anigaasaqarnikkut atugaanik tunngaveqartinneqarpat, tamatumunnga ilanngullugu akiliisinnaajunnaarpat.

Imm. 3. Ilinniagaqartunut ilinniarnermi atatillugu akeqanngitsumik nerisaqartitaallutillu najugaqartitaasunut tamatumunnga akiliutit stipendianiit ilanngaanneqartassapput, ilinniagaqartoq kollegiani najugaqanngippat 18-illu inorlugit ukioqanngippat.

Imm. 4. Kalaallit Nunaanni ilinniagaqarnissamut piareersaataasumik ilinniagaqartut, 18-it inorlugit ukiullit illoqarfigisap avataani kollegiani najugaqartut nerisaqarnissamulli periarfissaqanngitsut ullormulluunniit ataasiaannarlutik nerisaqartinneqarsinnaasut nerisassanut tapiiffineqartarput.

Imm. 5. Ilinniagaqartoq imm. 1-imi pineqartut arlaanni allatut inissisimalerpat, stipendiap annertussusia piffissamit qinnuteqarfusumiit allanngortinneqassaaq, taamaattoq siusinnerpaamik ulloq inissisimaaffiup allanngorfia aallarnerfigalugu.

Meeqqanut tapit

§ 13. Ilinniagaqartoq meeqqanut 18-it inorlugit ukiulinnut pilersuisussaataappat imaluunniit akilersuisussaataappat, meeqqanut ataasiakkaanut tamanut tapiissuteqartoqassaaq (meeqqanut tapit), ilinniagaqartoq Kalaallit Nunaanni Namminersorlutik Oqartussanit stipendianiik pisartagaqarpat, taamaattoq tak. § 60. Tamanna aamma atuuppoq ilinniagaqartoq inuutissarsiummik ilinniagaqarnerminut atatillugu ilinniagaqarnermini akissarsiaqarpat, tamatumani sulisitsisua akissarsiaritinneqartunut tapiissutisatut ilinniagaqarnermi inuutissarsiummik ilinniartitsinerit aamma inuutissarsiummik ilinniartitsinerup iluani pikkorissaanerit pillugit Inatsisartut inatsisaat naapertorlugu, imaluunniit lærlinginik Kalaallit Nunaanni sungiusarlutik suliffeqartartut Danmarkimilu ilinniartut ilinniagaqartut tunngatillugu pisartagaqarpat,

Imm. 2 Meeraq Kalaallit Nunaanni najugaqarpat, akilersuutip nalinginnaasup assinganik tapiissuteqartoqassaaq. Meeraq Danmarkimi najugaqarpat Danmarkimi akilersuutip nalinginnaasup assinganik tapiissuteqartoqassaaq. Meeraq Kalaallit Nunaanni imaluunniit Danmarkimi najugaqanngippat, Kalaallit Nunaanni akilersuutip nalinginnaasup assinganik tapiissuteqartoqassaaq.

Imm. 3. Ilinniagaqartup meeraq pisortanit tamakkiisumik pilersorneqarpata ilinniartumut meeqqanut tapiissuteqartoqassanngilaq.

Imm. 4. Ilinniagaqartup piffissani qiortakkanik atugaqannginnissamik aalajangiiffigisaani, ilinniagaqartumut meeqqanut tapiissuteqartitsisoqassanngilaq, tak. § 55.

Ilinniagaqarnermut akiliut misilitsinnermullu akiliut

§ 14. Ilinniagaqarnermi akiliutit 75 %-iinik ukiumut tapiisoqartarpoq, ukiumut aningaasat qaffasinnerpaaffissaannut 80.000 kr.-inut, taamaattoq tak. imm. 4. Ukiumut ilinniagaqarnermut akiliutit qaffasinnerpaaffissaat 80.000 kr.-it qaangersimappatigit, taakkua avataanniittunut akiliutit 50 %-iinik tapiisoqarsinnaavoq, taamaattoq tak. imm. 3 aamma 4.

Imm. 2. Ilinniagaqarnermi akiliutinut imm. 1-imi pineqartunit tapiissutinit matuneqartanngitsunut tapiisoqarsinnaavoq ilinniagaqarnermi akiliutissamut attartukkanik qaffasinnerpaamik ukiumut 60.000 kr.-inik, taamaattoq tak. imm. 3 aamma 4.

Imm. 3. Ilinniagaqartumut pineqartumut ukiumut qaffasinnerpaamik tapiissuteqartoqarsinnaavoq 100.000 kr.-inik ilinniagaqarnermut akiliummut matussutissanik.

Imm. 4. Tapiissuteqartoqassanngilaq imaluunniit ilinniagaqarnermi akiliummut attartortitsisoqassanani

- 1) Ilinniagaqarnermiuteqarnermut Naalakkersuisoqarfup aningaasaqarnikkut suliffeqarnikkullu nalilersuutit naapertorlugit nalilerpagu, ilinniagaq pineqartoq Kalaallit Nunaannut naleqqutinngitsoq, imaluunniit Kalaallit Nunaanni inuiaqatigiinnut ilinniakkatut appasinnerusumik naleqartuusoq, ilinniakkanut allanut tapiiffigineqarsinnaasunut Kalaallit Nunaanni Danmarkimiluunniit ersarissumik appasinnerusumik naleqartoq,
- 2) ilinniagaqartoq qiortakkanik pineq ajorpat, imaluunniit
- 3) ilinniagaqartoq siusinnerusukku ilinniagaqarnermut akiliummut tapiissutininik tunineqarsimasoq ilinniakkamut allamut, ilinniagaq pissusissamisoortumik ilinniakkamut naammassisamut ilassutaanngippat.

Imm. 5. Ilinniakkami ilinniagaqarnermiuteqarfusinnaasumi misilitsinnernut akiliutit tamakkiisumik akilerneqassapput, aningaasartuutit pisortanit allanit akilerneqanngippata.

Kapitali 4

Piumasaqaatit ilinniakkanut ataasiakkaanut tunngasut

Ilinniagaqarnissamut piareersarluni ilinniarnertit

§ 15. Ilinniarnertuunngorniarmimi ilassutaasumik ilinniarnertit aamma ilinniarnertuunngorniarmimi ilinniartitsissutinik ataasiakkaanik ilinniarnertit, tak. ilinniartitsissutit ataasiakkaat, ilassutaasumik pikkorissarnerit namminerlu ilinniartut pillugit nalunaarut, ima pisoqarpat:

- 1) ilinniartoq ilassutaasumik pikkorissarnissamik aamma ilinniarnertuunngorniarmimi ilinniartitsissutini ataasiakkaani ilitersuisumit ilitersorneqarsimappat aamma

2) ingerlatami agguaqatigiissillugu sapaatip-akunneranut lektionini 23-ni ilassutaasumik ilinniartoqarpat.

Imm. 2. Ilinniarnertuunngorniarfimmi ilassutaasumik ilinniarnertit imaluunniit ilinniarnertuunngorniarfimmi ilinniartitsissutit ataasiakkaat tapiiffigineqarsinnaanngillat, ilinniagaqartoq ilinniartitsissutini misilitsinnermi soraarummeernermiluunniit 7-skala malillugu 02-mik qaangerluguluunniit karakteereqareerpat, imaluunniit soraarummeernermi karakteeri E GGS-skala atorlugu, ilinniagassatut kissaatigisami ilinniartunngortinneqarnissamut qaffasinnerusumik karakteereqarnissaq qaffasissuserluunniit qaffasinnerusoq piumasaqaataanngippat.

Imm. 3. Ilassutaasumik pikkorissarnermi taamaallaat ilinniartitsissumut ataatsimut imaluunniit ilinniarnertuunngorniarfimmi ilinniartitsissutit ataasiakkaat ataasiaannarluni ilinniagaqarnersiuteqartitsisoqarsinnaavoq, ilinniartitsissutip siusinnerusukkut angusiffusimannginnera apeqqutaatinngu.

Imm. 4. Ilinniagaqarnersiuteqarnermut Naalakkersuisoqarfup akuersineratigut ilinniagaqarnersiuteqartitsisoqarsinnaavoq immikkut aallarnisaalluni ingerlatsinernut, ilinniartitaanerup aallartinneranut atasumik aaqqissuunneqartumut, ilinniagaqartussamik ilinniakkamut piareersaannerusumut.

§ 16. Ilinniagaqalernissamut piareersaataasumik ilinniakkamut ataasiinnarmut tapiisoqarsinnaavoq, taamaattoq tak. imm. 4 aamma § 15.

Imm. 2. Ilinniagaqalernissamut piareersaataasumik ilinniakkamut tapiisoqarsinnaanngilaq, ilinniartoq ingerlaqqiffiusumik ilinniakkamik naammassinnissimappat.

Imm. 3. Ilinniagaqarnersiuteqarnermut Naalakkersuisoqarfik imm. 1-ip sanioqqunneqarnissaanik akuersinnaavoq, ilinniakkanut aalajangersimasunut Naalakkersuisoqarfimmit tamanut saqqummiunneqartunut naleqqiullugu.

Imm. 4. Imm. 1 atortinneqassanngilaq immikkut aallarnisaalluni ingerlatsinernut, ilinniartitaanerup aallartinneranut atasumik ingerlanneqartunut.

§ 17. Ilinniagaqalernissamut piareersaataasumik ilinniartumut ilinniagaqarsiaqartitsisoqarsinnaanngilaq, ilinniartoq ilinniakkap aallartinneranut naleqqiullugu ukiuni kingullerni 5-ini ilinniagaqalernissamut piareersaataasumik ilinniagaq ataasiaannarani unitsissimappagu.

Imm. 2. Imm. 1 malillugu unitsitsinertut isigineqanngillat ilinniarnermik unitsitsigallarneq, tamatumunnga ilanngullugit erninnermut atatillugu unitsitsigallarneq aamma uppersarsineqarsinnaasumik napparsimaneq pissutigalugu peqannginneq.

Imm. 3. Ilinniagaqarnersiuteqarnermut Naalakkersuisoqarfik imm. 1-ip sanioqqunneqarnissaanik akuersinnaavoq, ilinniartarfup nalilerpagu, ilinniartup ilinniagaq qinnutigineqartoq naammassisinnaagaa, Ilinniagaqarnersiuteqarnermullu Naalakkersuisoqarfimmut sanioqqutitsinissaq inassutigalugu.

Inuutissarsiutinut ilinniartitaanerit

§ 18. Ilinniagaq naammassisaq ataaseq sinnerlugu ilinniagaqarnersiuteqartitsisoqarsinnaanngilaq. Taamaattoq ilinniagaqarnersiuteqartitsisoqarsinnaavoq ilinniakkamut allamut ataatsimut suliamik ilinniagaqarsimasutut nalilimmut imaappat:

1) ilinniarnep siusinnerusukkut ilinniagarisimasamut pissusissamisuuginnartumik ilassutaappat,

imaluunniit

2) ilinniarneq tassaappat inuutissarsiorsinnaajunnaarneq pissutigalugu pisariaqartumik allamik ilinniaqqinneq.

Imm. 2. Ilinniarteq sivikitsumik inuutissarsiummik ilinniakkatut qaffasissusilimmik qaffasinnerusumiluunniit ilinniareersimasoq, sivikitsumik inuutissarsiummik ilinniakkami ilinniagaqarnersiaqarsinnaanngilaq.

Imm. 3. Ilinniagaqarnersiuteqartitsisoqarsinnaanngilaq inuussutissarsiutinut ilinniartitaanermut imaluunniit inuussutissarsiutinut ilinniakkamut sivikitsumut, ilinniagaqarteq ingerlaqqiffiusumik ilinniagaqareersimappat.

Imm. 4. Ilinniagaqarnersiuteqarnermut Naalakkersuisoqarfiup imm. 1 aamma 3 sanioqqunneqarnissaa akuersissutigisinnaavaa pissutsit immikkut ittut apequtaatillugit, tamatumunnga ilanngullugit:

1) ilinniagaqarniartup suliffeqarnissamut periarfissai killeqarpata, imaluunniit

2) ilinniakkami qinnuteqarfusumi ilinniarsimasunik Kalaallit Nunaat immikkut ittumik pisariaqartitsippat.

§ 19. Inuussutissarsiutinik ilinniartitaanermi ilinniartumut imaluunniit inuussutissarsiutinut ilinniakkamut sivikitsumut ilinniagaqarsiaqartitsisoqarsinnaanngilaq, ilinniarteq ilinniakkap aallartinneranut naleqqiullugu ukiuni kingullerni 5-ini ilinniagaq imaluunniit inuussutissarsiutinut ilinniagaq sivikitsaq ataasiaannarani unitsissimappagu.

Imm. 2. Taamaattoq imm. 1 naapertorlugu unitsitsinertut naatsorsuunneqanngillat sungiusarluni suliffissamik pissarsisimannginneq, tassunga ilanngullugit naartunermi ernereernermilu ilinniannigiffeqarallarneq uppersarsateqarlunilu napparsimalluni peqannginneq pissutigalugit ilinniarnermik unitsitsigallarnerit.

Imm. 3. Ilinniarfiup inassutigippagu ilinniagaqartup ilinniagaq qinnutigisani naammassisinnaassagaa, Ilinniagaqarnersiuteqarnermut Naalakkersuisoqarfiup tamatumunnga qinnuteqartoqarnera naapertorlugu imm. 1-imik saneqqutsisinnaaneq akuersissuteqarfigisinnaavaa, pissutsit immikkut ittut tamanna aqqutissiuunneqarsinnaatippassuk, tamatumani aamma:

1) ilinniartup suliffeqarnissamut periarfissai killeqarpata, imaluunniit

2) Kalaallit Nunaat ilinniarniakkamut qinnuteqarfusumut ilinniarsimasunik immikkut ittumik pisariaqartitsippat, imaluunniit

3) unitsitsineq piffissap misiliinerup nalaani pippat.

Ingerlaqqiffiusumik ilinniarnertit

§ 20. Qiortakkap iluani qiortakkanik katillugit 82-inik tunisisoqarsinnaavoq (killissarititaq), taamaattoq tak. §§ 25-28

Imm. 2. Ilinniagaqarnermut qiortakkamik aqqissuussinermut ilaasumut annerpaamik killissarititap aammalu qiortakkat atoreersimasat assigiinngissusaata amerlaqataanik qiugassanik tunniussisoqarsinnaavoq.

Imm. 3. Ilinniagaqarteq ingerlaqqiffiusumik ilinniakkamik atuagarsornerup akissarsiaqaatigalugulu sungiusarluni sulinerup paarlakaaffigisaannik naammassisaqarsimasoq, qiortakkatigut killigisaminit ilanngaanneqassaaq, ilinniakkap sivilissusissaata nalinginik, piffissamik atuagarsornermik qaangiinerusimasinnaasumik ilallugit.

Imm. 4. Ilinniagaqarteq qiugassanik ilinniarnermi atuagarsornermut atugassatut naatsorsuussanik

ikinnerusunik atugaqarsimaguni, killissarititami qiuqassanik ilinniarnermut atugassat assinginik ilanngaavigneqassaaq, qiuqassat atorineqanngitsut ilanngaallugit.

Imm. 5. Ingerlaqqiffiusumik ilinniakkamik unitsitsinermi taamaallaat qiuqassanik tunniunneqareersimasunik killissarititaaq ilanngaavigneqassaaq.

§ 21. Ilinniakkanut ataasiakkaanut qiuqassat tunniunneqassapput, qaammatit ilinniarnermut naatsorsuussat nalingi qiuqassanik 12-inik ilallugit (piffissaaq ilinniagaqarnersiuteqarfiusinnaasoq), taamaattoq tak. § 23, imm. 5 aamma §§ 24-26.

Imm. 2. Ilinniagaq bacheloritut aamma kandidatitut ilinniarnermik immikkoortoqarpat, piffissamut tapiiffigneqarsinnaasumut naleqqiullugu, ilinniakkatut marluttut immikkuullarissutut isigigneqassaaq.

Imm. 3. Ingerlaqqiffiusumik ilinniakkami atuagarsornerup akissarsiaqarlunilu sungiusarluni sulinerup paarlakaaffigisaanni, piffissap tapiiffigneqarsinnaasup assingaa, piffissaaq atuagarsornermut atugassatut naatsorsuussaaq qaammatinut naatsorsorlugu, qiorsinernik 12-inik ilassusigaq.

Imm. 4. Siusinnerusukkut ilinniagarisimasaq pissutigalugu, ingerlaqqiffiusumik ilinniakkami kingusinnerusukkut aallartitami, piffissamik ilinniarfiusussamik sivikillisaasoqarsimappat, ilinniakkami aallartitami qiuqassat ilanngarneqassapput, qaammatit ilinniarnernup sivikillineqarnerisa assinganik.

§ 22. Ilinniakkani ataasiakkaani atuannigiffeqarnermi akiliunneqarluni angalasoqarsinnaavoq, angalanissamut atasumik akiliunneqarluni angalasinnaanissamut piumasaqaatit naammassineqarsimappata, tak. §§ 39-41.

Imm. 2. Akiliunneqarluni angalasoqarsinnaavoq, tak. § 39, aatsaat ilinniagaqartoq:

- 1) piffissap qinnuteqarfigisap nalaani qiortakkanik pissarsisarpap, aamma
- 2) akiliunneqarluni sulinnigiffeqarluni angalanerup aallartinnerani minnerpaamik qiorsinernik arfineq-marlunnik sinneqarpat.

Imm. 3. Juullimi ilinniagaqanngiffeqarnermut atatillugu, tak. § 41, akiliunneqarluni aatsaat angalasoqarsinnaavoq ilinniagaqartoq:

- 1) piffissami qinnuteqarfigisap nalaani qiortakkanik pissarsisarpap, aamma
- 2) 1. november ukiumi ilinniagaqarnersiuteqarfiusumi minnerpaamik qiorsinernik 7-inik tapiissutisiassaqarpat.

§ 23. Killissarititaaq, tak. § 20, imm. 1, naleqqiussinikkut annertusineqassaaq, piffissaaq ilinniakkamut naatsorsuussaaq, tamatumani bacheloritut kandidatitullu assingusunulluunniit ilinniakkanut tamarmiusumik piffissaliussat ilanngullugit, qaammatinik 60-inik sivilsineruppat. Ilinniakkamik taamatut ittumik ilinniartoq unitsitsippat qiuqassat amerlinissaat atorunnaarsinneqassaaq.

Imm. 2. Ilinniagaqartup qiuqassanik aalajangersimasunik piffissaaq ilinniagaqarnersiuteqarfigisani sivitisorsimappagu, tak. § 20, imm. 1, taassuma assinganik qiuqassanut killissarititaaq sivitorneqassaaq. Ilinniagaqartup ilinniakkani tapiiffigneqarsinnaanermigut sivitugaq unitsippagu, killissarititap sivitsonerata assinganik qiuqassat killiliussat ilanngarneqassapput. Ilinniagaqartup piffissaaq tapiiffigneqarsinnaasoq ilinniarnerninik sivikillisaanneqarneq pissutigalugu sivikillisissimappagu, tak. § 21, imm. 4, killissarititaaq annikillisinneqassanngilaq, tak. § 20, imm. 1.

Imm. 3. Ilinniagaqarnersiuteqarnermut Naalakkersuisoqarfiup tamanna pillugu qinnuteqartoqareerneratigut aalajangersinnaavaa, killissarititamik ilassutitut qiuqassat

amerlineqarnissaat, tak. § 20, imm. 1, uppersineqarsinnaasumik napparsimanerup imaluunniit pissutsit immikkut ittut allat ilinniagaqartumut namminermt tutsinneqarsinnaanngitsut nassatarisimappassuk, ilinniagaqartup ilinniakkaminik naammassinissinnaannginnini pissutigalugu ilinniakkamut allamut nuuttariaqarnera. Ilinniagaqarnersiuteqarnermut Naalakkersuisoqarfiup aalajangissavaa qiugassanik qassinik killissarititaq ilaneqassanersoq.

Imm. 4. Ilinniagaqartoq ingerlaqqiffiusumik ilinniarnermut Naalagaaffiup

ilinniagaqarnersiuteqartitsineranit stipendianik pissarsisimappat, killissarititaq, tak. § 20, imm. 1, qaammatinik SU-mit pissarsianik ilanngaavigineqassaaq.

Imm. 5. Ilinniagaqartoq ingerlaannarluni ilinniakkami nangitsiviusumi, qiortakkanik atuiffiusumi ilinniakkallu naammassisap pissusissamisuuginnartumik nanginnerisaani ingerlaqqittoq, ilinniakkamit naammasseqqammisaminit qiortakkat marluk tikillugit tunineqarsinnaavoq. Qiortakkat ilinniakkat marluk akornanni tunniunneqassappat, uterteqquneqarsinnaallutillu ilinniagaqartoq ilinniakkami nangitsiviusumi aallartinnippat.

§ 24. Ilinniagaqartoq meerartaarnerminut imaluunniit qitornavissiartaarnerminut atatillugu ilinniagaqarnersiutiminut qiortakkamik tapiliussanik pisinnaatitaaffeqarpoq, tamatumani ilinniagaqartup meeraq najugaqatigippagu aammalu erninerminut atatillugu ilinniakkaminik unitsitsigallarsimangikkuni, tak. imm. 5. Ilinniagaqartup ilinniarnermi naammassissutigisassaanik akissarsiaqarluni sungiusarluni sulinerani, ernineq qitornavissiartaarnerluunniit pippat, qiortakkamik immikkut tunniussisoqassanngilaq.

Imm. 2. Anaanaasoq qiortakkanik 7-inik ilassutinik pisinnaatitaavoq, 9-nut annertusineqarsinnaasunik marlulisoqarsimappat.

Imm. 3. Ataataasoq qiortakkanik 3-nik ilassutinik pisinnaatitaavoq, 4-nut annertusineqarsinnaasunik marlulisoqarsimappat.

Imm. 4. Ilinniagaqartoq erninermt atatillugu ilinniakkaminik unitsitsigallarnerup kingorna ilinniakkap ilusiligaanera pissutigalugu, malittarisassat ilinniakkamut atuuttut naapertorlugit ilinniakkamigut tamakkiisumik siuariartornissaminut periarfissaqarluni, ilinniakkaminut uteqqissinnaanngitsoq, ilinniarniup inassuteqareerneratigut immikkut qiortakkanik tallimat angullugit tunineqarsinnaavoq, imm. 2-mi aamma 3-mi tapiliussat taaneqartut saniatigut piffissamut ilinniarnimut atugassanik.

Imm. 5. Ilinniagaqartoq erninermt atatillugu ilinniakkaminik unitsitsigallartutut isigineqassaaq, erninermt atatillugu ilinniakkamik unitsitsigallarnermi nalaani ECTS-pointit 20-t tikillugit ilinniagaqaraluaruniluunniit.

§ 25. Elite Sport Greenlandimit innersuunneqarlutik Ilinniagaqarnersiuteqarnermut Naalakkersuisoqarfimmit timersornermik immikkut piginnaanilittut imaluunniit timersortartutut piukkunnassuseqartutut akuerisaasut, ilinniarnerrullu ingerlaneranik immikkut ittumik aaqqissuussamik Ilinniagaqarnersiuteqarnermut Naalakkersuisoqarfimmit akuerisaasumik ingerlataqartut, piffissamut tapisiaqarfiusumut ilassutinik qiortakkanik immikkut tunineqarsinnaapput.

Imm. 2. Ilinniarnerup immikkut ittumik aaqqissuussap sivisussusissaatut ilimagineqartoq tunngavigalugu immikkut qiortakkanik qanoq amerlatigisunik tunisisoqarnissaa Ilinniagaqarnersiuteqarnermut Naalakkersuisoqarfiup aalangiiffigissavaa.

§ 26. Ilinniagaqartoq aqutissiuusumut, tak. § 5, imaluunniit ilinniarfimmuq qinnuteqareernermi kingorna, qiortakkanik 12-t angullugit immikkut tunineqarsinnaavoq, ilinniagaqartoq ilinniakkamini kinguaattoorsimappat, makkuninnga uppersarneqarsinnaasunik pissuteqarluni:

1) ilinniarfiup aqutsisoqarfiani, ilinniagaqartut siunnersuisoqatigiivini ilinniarfimmullu atasumik kattuffinnut assingusunut peqataaneq, imaluunniit

2) nammineq napparsimaneq imaluunniit qaniginerpaasat napparsimanerat toquneralluunniit.

Imm. 2. Kinguaattoorneq ilinniagaqarnersiuteqarnerup nalaani pisimassaaq. Immikkut qiortakkat amerlassusaasa ilinniagaqartup ilinniarnerni qaammatit kinguaattoorfigisai amerlaqatigissavaat.

§ 27. Ilinniagaqartoq qiortakkat pinnginnissaanik qinigaqarsinnaavoq, tak. § 55. Qiortakkat pinnginnissaanik toqqaaneq, killissarititamik imaluunniit piffissamik tapiissuteqarfimmik allannguineramik nassataqassanngilaq.

Timersornermik immikkut piginnaanilinnut timersortartutullu piukkunnassuseqartunut ilinniartitsinerit immikkut aaqqissuussat

§ 28. Timersornermik immikkut piginnaanillit timersortartutullu piukkunnassuseqartut ilinniartitsinerni immikkut aaqqissuussani ilinniagaqarnersiuteqarsinnaapput, timersornermik immikkut piginnaanillit timersortartutullu piukkunnassuseqartut, timersornertik pissutigalugu ilinniakkanik tapiiffiqarsinnaasunik naammassinninnissamut periarfissaqanngippata.

Imm. 2. Timersornermik immikkut piginnaanillit timersortartutulluunniit piukkunnassuseqartup ilinniarni katitissavaa, timersorneq ilinniarnertu katillutik piffissaq tamaat ilinniarnertut annertussuseqartillugit. Ingerlatsineq Elite Sport Greenlandimiit inassuteqaateqartoqareerneratigut ilinniagaqarnersiuteqarnermut Naalakkersuisoqarfimmit akuerineqassaaq.

Kapitali 5

Stipendiat meeqqanullu tapit naatsorsorneqartarnerat akilerneqartarnerallu

§ 29. Ilinniakkanut qiortakkanut ilaangitsunut stipendiat meeqqanullu tapit qaammatikkaartumik naatsorsorneqartarput. Ilinniarnertu aallartinnerani, naammassinnerani, unitsinnerani aamma unitsikkallarnerni stipendiat meeqqanullu tapit ullut ilinniarfigisat ataasiakkaarlugit naatsorsorneqartarput. Ullup killiliussap aalajangiunnerani pisariaqartumik piffissat angalaffiit akunniffillu ilanngunneqarsinnaapput. Ilinniarfimmik sungiusarlunilu suliffimmik paarlaanermi, ilinniarfimiinnermi ullut ilinniartitsiffiusut ataasiakkaarlugit stipendiat naatsorsorneqartarput.

Imm. 2. Stipendiat aamma meeqqanut tapit tunniunneqartarput, ullormit allakkatigut qinnuteqaatip tiguneqarfianit. Meeraq piffissap tapisiaqarfup nalaani inunngorpat, meeqqanut tapit piffissamit inunngorfusumit tunniunneqassapput, ilinniagaqartoq meeqqap inunngornerata kingorna qaammatit marluk qaangiutsinnagit meeqqanut tapinik qinnuteqarpat.

Imm. 3. Stipendiat meeqqanullu tapit qaammatikkaartumik siumoortumik tunniunneqartarput, qaammammiillu qinnuteqaatip tiguneqarfianiit siusinnerpaamik aallartissinnaallutik, ilinniagaqartup nalunaarummi ilinniagaqarnersiuteqarnissamut piumasaqaatit eqquutissimappagit.

Imm. 4. Stipendianik aamma meeqqanut tapit tunniunneqartarunnaassapput ilinniagaqartoq

ilinniarnerninik ingerlatsiunnaarpat taamaalillunilu ilinniagaqarnersiuteqarsinnaajunnaarluni.
Akiliisarneq aallarteqqinneqassaaq piffissamit ilinniagaqartup ilinniarnerninik ingerlatseqqilerfianit.

Imm. 5. Ilinniagaqartup takkutinngitsoornerata malitsigisaanik stipendiat meeqqanullu tapit annikillisarneqarsinnaanngillat, tak. taamaattoq imm. 6.

Imm. 6. Ilinniakkamik Majoriami ingerlatsinermi kommunalbestyrelsip ilinniarnermut tapiissutit ilanngaavigissavai, tak. imm. 7, takkuttannginnermi imaluunniit inortuisarnermi takkuffissaasumut ilinniartitsinermi, imaluunniit isumaqatigiissutaasutut sungiusaammik ingerlatsinissami, tamanna ilinniarfimmit akuerisaasumik pisimanngippat.

Imm. 7. Imm. 6-imi eqqaaneqartoq stipendianik ilanngaaneq, tak. § 12, imm. 1, nr. 9 naatsorsorneqassaaq qaammammut agguaqatigiissillugit nal. ak. 173,3 atorlugit, ilinniagaqarnersiutit annertussusissaat naapertorlugit naatsorsorneqartumik. Nalunaaquttap akunneranut annertussusissaq tamatuma kingorna agguarneqassaaq § 12, imm. 1, nr. 9-mi aalajangersagaq naapertorlugu 173,3-mik agguaaluni.

§ 30. Ilinniagaqartoq ilinniarnermi aallartinnerani ilinniarnerrullu nalaani qiortakkanik pisinnaatinneqassaaq, ilinniagaqartoq qaammatip akiliiffusussap ulluisa 15-iat killigalugu ilinniarnerninik ingerlatsippat. Ilinniarnernup aallartinnerani ilinniagaqartut, qaammatip akiliiffusup 15-iata kingorna ilinniarnerminnik ingerlatsilersut, tamanna pillugu allakkatigut qinnuteqareernermikkut qiugassaq ataaseq siuartissinnaavaat, taannalu ilutigisaanik killissarititaasumit piffissamillu ilinniarfimmit ilanngaanneqassaaq. Ilinniagaqartup ilinniarnernup aallartinnerani naammassineranilu ilinniarnerninik ingerlatsinera aalajangiunneqassatillugu, pisariaqartumik angalanissat akunninnerillu ilanngullugit naatsorsuutigineqassapput, tamatumunnga ilanngullugit ilinniarnernup aallartinneranut atasumik ilisarititsissutinik ingerlatsinerit.

Imm. 2. Qiortakkat qaammatikkaartumik siumoortumik akilerneqartarput, siusinnerpaamillu ilinnigaqarnersiuteqarnissamik qinnuteqaammik qaammammi tigusiiffimmit aallartinneqartarlutik, ilinniagaqartup nalunaarummi ilinniagaqarnersiuteqarnissamut piumasaqaatit eqquutissimappagit. Taamaattoq meeqqanut tapit ernisoqarneraniit tunniunneqarsinnaapput, ilinniartoq ernereermermi kingorna qaammatit marluk qaangiutsinnagit meeqqamut tapinik qinnuteqarsimappat.

Imm. 3. Ilinniagaqartup piffissamit ilinniarnerninik ingerlatsiunnaarfianit, taamaalillunilu ilinniagaqarnersiuteqarnissamik pisinnaatitaaffeerunneraniit qiortakkat tunniunneqartarunnaassapput. Piffissaq taanna qaammatip ulluisa 15-iata kingornaniippat, qiortakkanik akiliisarneq qaammammit tullermit atuutilersumik unitsinneqassaaq.

Imm. 4. Ilinniagaqartup piffissamit ilinniagaqarqilerfianit qiortakkanik akiliisarneq aallarteqqinneqassaaq. Piffissaq taanna qaammatip ulluisa 15-iata kingornaniippat, qiortakkanik akiliisarneq aatsaat qaammatip tullianiit atuutilissaaq.

Imm. 5. Ilinniagaqartup takkutinngitsoornerata malitsigisaanik stipendiat meeqqanullu tapiujunnartut qiortakkatut naleqartut annikillisarneqarsinnaanngillat.

Kapitali 6

Immikkut tapiissutit

Ineqarneq

§ 31. Ilinniarnernup aallartinneranut, unitsinneranut imaluunniit naammassinneranut atatillugu, pissutsit immikkut illuinnartut atuutsillugit, qinnuteqareernikkut ilinniagaqartup sapaatip-akunneri pingasut tikillugit ineqarallarnermut aningaasartuutit tamakkiisumik ilaannakortumilluunniit akilerallartissinnaavai, tassunga ilanngullugit:

- 1) angallannermi pissutsit tunngavigalugit ineqarallartariaqarneq pisariaqarpat, imaluunniit
- 2) ilinniartup nammineq inissarsiornera, imaluunniit ineqartuaannarnera imaluunniit allatut ineqarniarnera pissutsit ilinniartup pisuussutiginnisai pissutigalugit iluatsissimanngippat.

Imm. 2. Akiliussigallarnermut aningaasartuutit nunatta karsianit aningaasalersorneqartumik ilinniarnermi taarsigassarsianngortinneqassapput, taakkulu ilinniagaqarnersiutit pillugit Inatsisartut inatsisaanni kapitali 5-mi maleruagassatut aalajangiussat naapertorlugit ernialersorlugillu utertillugit akilersorneqassapput.

§ 32. Ilinniagaqartut Kalaallit Nunaanni Danmarkimiluunniit ilinniarfimmiittut imaluunniit sungiusarlutik sulisut, qinnuteqareernermikkut ilinniarfimiinnerminni imaluunniit sungiusarlutik sulinnerminni ineqarnermut qaammammut tapiiffigineqassapput ilinniartut ineqarfiini akigitinneqartumut naapertuuttumut, ima pisoqartillugu:

- 1) ilinniarfimiinneq imaluunniit sungiusarluni sulineq qaammatit arfinillit ataallugit sivilissuseqarpat,
- 2) ilinniagaqartup ineqarnermut aningaasartuutini uppersarsinnaappagit, aamma
- 3) ilinniagaqartoq Kalaallit Nunaanni najugaqarfimmini angerlarsimaffimmik namminerisaminik pilersitsisimallunilu ataavartitsippat, najugaqarnermut uppersaammik aamma attartornissamut isumaqatigiisummik akuerisaasumik, piginneqataanermut uppersaammik imaluunniit illumik piginnittuunermut uppersaammik uppersaaserneqartumik. Namminerisamik angerlarsimaffik angajoqqaat najugaqarfiannit immikkuussaaq, aningaasaqarnikkullu namminersortuussalluni.

Akiliunneqarluni angalanerit

§ 33. Ukununnga atatillugu akiliunneqarluni angalasoqarsinnaavoq:

- 1) ilinniagaqarnerup aallartinnerani, unitsinnerani, unitsinneqarallarnerni naammassinneraniluunniit, tak. §§ 35 aamma 37,
- 2) ernereernerup kingorna ilinniagaqarnermik unitsitsigallarnermi, tak. § 38,
- 3) sulinngiffeqarneq, tak. §§ 39-40,
- 4) juullimi atuannigiffeqarneq, tak. § 41,
- 5) ilinniakkamut attuumassuteqartumik najugaqarneq il.il. tak. § 42,
- 6) pinartumik napparsimasoqarnera toqusoqarneralu, tak. § 43,
- 7) soraarummeeqqinneq imaluunniit napparsimareernerme soraarummeerneq, tak. § 36 aamma
- 8) atuannigiffeqarallarneq ilinniagaqartup uppersarneqarsinnaasumik annertuumik Nappaateqarnerani, tak. § 35, imm. 3.

Imm. 2. Angalanermik akiliussisoqassanngilaq ilinniagaqartoq suliffimmini suliunnaarluni imaluunniit suliffissamini sulilissalluni sulisitsisumit akiliunneqarluni angalassappat.

Imm. 3. Apparisaq akiliunneqarlutik angalasinnaanngillat, tak. § 6, § 37, kisianni imm. 3-mi aamma § 41, imm. 3-mi 4-milu pisut taaneqartut eqqaassanngikkaanni.

§ 34. Angallassinermut periarfissat sapinngisamik akikinnerpaat atorneqarneranni bilitsimut unnuinernullu aningaasartuutit akiliunneqarluni angalanernut ilaapput.

Imm. 2. Bilitsinik utertinneqarsinnaanngitsunik atuinngitsoqarsimatillugu, ilinniagaqartunut 18-it sinnerlugit ukiulinnut ilinniarnermut taarsigassarsitsisoqarsinnaavoq, tak. § 51, imm. 4, bilitsimik taartissamik pisinissamut aamma pisariaqartumik unnuinerni aningaasartuutitut, taarsiullugu bilitsip atorneqarsinnaalernissaata tungaanut. Ilinniarnermut taarsigassarsiat ernialersorneqarlutillu akilernerqassapput ilinniagaqarnerisutit pillugit Inatsisartut inatsisaanni kapitali 5-imi maleruagassat malillugit.

Imm. 3. Aqqut alla atorlugu angalasoqarsimappat, annerpaamik angallassinermut akikinnerpaamut akiusup nalinganut aningaasartuutit matussuserneqassapput.

Imm. 4. Bilitsinik allannguinerne aningaasartuutit matussuserneqassanngillat.

Imm. 5. Ilitersuisup aqqutit akikinnerpaat qularnaarnissaat siunertarlugu, piffissatut angallavissatut kissaatigineqartoq, ullunik pingasunik sioqqullugu kingoqqulluguluunniit ullormik aallarfigisamik inaarutaasumik aalajangiisinnaavoq, taamaattorli ilinniagaqartoq ilinniarnernup aallartinneranut atatillugu angalanermi, ilinniarnernup aallartinnerani illoqarfimmi ilinniarfissaminiittussanngorlugu.

§ 35. Ilinniagaqarnissap aallartinneranut atatillugu, aalajangersimasumik najugaqarfup aamma illoqarfimmut ilinniarfissamut naleqqiullugu mittarfiup, umiarsualiviup imaluunniit qimuttuitsut unittarfiata qaninnerup akornanni angalaneq akilernerqassaaq. Ilinniagaq naammasseqqammisaaq nangiinnarlugu ilinniakkamik allamik aallartitsinermi, Kalaallit Nunaanni aalajangersimasumik kingullertut angerlarsimaffigisap aamma illoqarfup ilinniarfusup qaninnerpaamik timmisartoqarfata, umiarsualiviata imaluunniit qimuttuitsut unittarfiata akornanni aqqummut akiliunneqarluni angalasoqassaaq, pisattanik assartuinertaqanngitsumik, ilinniagaqarniartoq illoqarfimmi ilinniarfusimi aalajangersimasumik najukkani attatiinnaraluarpaguluunniit.

Imm. 2. Ilinniagaqarnerup naammassineranut atatillugu illoqarfimmut ilinniarfisamut naleqqiullugu mittarfiup, umiarsualiviup imaluunniit qimuttuitsut unittarfiata qaninnerup akornanni angalaneq akilernerqassaaq aamma ilinniarnernup aallartinnginnerani Kalaallit Nunaanni aalajangersimasumik najugaqarfisap akornanni angalaneq akilernerqassaaq. Naammassinermit kingusinnerpaamik ukiup ataatsip qaangiunnerani angalasoqareersimassaaq.

Imm. 3. Ilinniagaqarnermik unitsitsinermi unitsitsigallarnermiluunniit, tassunga ilanngullugu atuannigiffeqarallarneq ilinniagaqartup uppersarnerqarsinnaasumik annertuumik nappaateqarnerani, illoqarfimmut ilinniarfusumut naleqqiullugu timmisartoqarfup, umiarsualiviup imaluunniit qimuttuitsut unittarfiata qaninnerpaap aamma ilinniagaqarnerup aallartinnerani Kalaallit Nunaanni kingullermik aalajangersimasumik angerlarsimaffiup akornanni akiliunneqarluni angalasoqassaaq, ilinniagaqarnerup aallartinneranut atatillugu illoqarfimmut ilinniagaqarfimmut akiliunneqarluni angalanissaq akuerineqarsimappat. Ilinniarnernup unitsinnerata unitsikkallarneraluunniit kingorna kingusinnerpaamik ukioq ataaseq qaangiuppat angalasoqassaaq. Ilinniagaqartoq ilinniagaqalernissamut piareersaataasumik ilinniakkap, ilinniarnertuunngorniarfimmi ilassutaasumik ilinniarnernup, inuutissarsiummik ilinniakkap imaluunniit bacheloritut ilinniarnernup unitsinnerani naammassineraniluunniit Kalaallit Nunaanni aalajangersimasumik najugaqarfimminut kingullermut akiliunneqarluni angalasinnaatitaasup, Kalaallit Nunaanni aalajangersimasumik najugaqarfimminut kingullermut akiliunneqarluni angalasinnaatitaanini attatiinnassavaa, ilinniagaqartoq ilinniakkamik unitsitsinermi naammassinninnermiluunniit kingorna

kingusinnerpaamik qaammatit 15-it qaangiunneranni ilinniakkamik nutaamik ilinniagaqarnersiuteqarfusinnaasumik aallartitsiguni.

Imm. 4. Ilinniarkinna assigiinngitsuniinnermut, ilinniarfimmiiillunilu sungiusarluni sulinerlut aamma sungiusarluni suliffiit assigiinngitsut paarlaannerinut atatillugu akiliunneqarluni angalasoqarsinnaavoq, ilinniarnernup aqqissuunnerata tamanna pisariaqalersippagu, nikinnissarlut aqqutissiisumit allakkatigut akuerineqarsimappat.

Imm. 5. Kalaallit Nunaanni sumiiffimmut ilinniagaqartup ornitassarinnikkaluagaanut akiliunneqarluni angalasoqarsinnaavoq, ornitassamut allamukarnerani aningaasartuutit ornitassavimmut naleqqiullugu aningaasartuutaasussanit annertunerunngippata.

Imm. 6. Ilinniagaqarnersiuteqarnermut Naalakkersuisoqarfup qinnuteqaat tunngavigalugu imm. 2-mi naggammi siullermi aamma imm. 3-mi ornitassap allannngortinnissaa akuersissutigisinnaavaa, pissutsit immikkut ittut atuutsillugit, tamatumunnga ilanngullugit ilinniarnernup naammassinerani unitsinneraniluunniit angerlamut angalanissaq sioqqullugu uppersarsarneqarsinnaappat, ilinniagaqartooq illoqarfimmi akiliunneqarluni orninneqarniartumi atorfinnissaminik isumaqatigiissuteqarsimasooq, imaluunniit ilinniagaqartup ilaqutai qaninnerit illoqarfimmut allamut nuussimappata.

§ 36. Ilinniagaqartooq Ilinniagaqarnersiuteqarnermut Naalakkersuisoqarfimmut tamanna pillugu qinnuteqareernermigut akiliunneqarluni angalanissamik akuerineqarsinnaavoq, siumut utimullu angalanissamut, illoqarfup Kalaallit Nunaanni Danmarkimiluunniit ilinniarfusup aamma Kalaallit Nunaanni illoqarfup aalajangersimasumik najugaqarfup akornanni, tak. § 39, imm. 1, soraarummeeqqinnissamut imaluunniit napparsimaneq pissutigalugu soraarummeernissamut atatillugu, imaappat:

- 1) soraarummeeqqinnissaq imaluunniit napparsimaneq pissutigalugu soraarummeernissaq, ilinniagaqartup § 35, imm. 2, § 35, imm. 4 imaluunniit § 39, imm. 1 naapertorlugit akiliunneqarluni angalanini pissutigalugu, illoqarfimmi ilinniarfigisaminiinnginnerata nalaani pissappat – akiliunneqarluni angalanissani atoruniuk aamma
- 2) soraarummeeqqinnissamut imaluunniit napparsimaneq pissutigalugu soraarummeernissamut pissusaaffik, ilinniagaqartup aatsaat paasisimappagu, § 35, imm. 2, § 35, imm. 4 imaluunniit § 39, imm. 1 naapertorlugit akiliunneqarluni angalanissap inniminnerneqareernerata kingorna.

Imm. 2. Qaammatit pingasut iluanni imm. 1 naapertorlugu akiliunneqarluni angalanissaq taamaallaat ataaseq akuereqqinneqarsinnaavoq.

§ 37. Ilinniarnernup aallartinneqanngit, unitsinneranngit, unitsikkallarneranngit imaluunniit naammassineranngit atatillugu ilinniagaqartumut ilinniarnernup ingerlanerani angalanermik akiliussisoqartillugu meeqqanngit 18-it inorlugit ukiulinnut akiliussisoqarsinnaavoq, taamaattoq tak. imm. 4, tamatumani:

- 1) meeraq ilinniagaqartumi najugaqarpat,
- 2) meeraq ilinniagaqartup nammineq qitornarippagu, imaluunniit ilinniagaqartup aapparisaata qitornarippagu, tak. § 6,
- 3) ilinniarneq imaluunniit ilinniarfimmiiinneq minnerpaamik qaammatinik qulinik sivilissuseqarpat, taamaattoq tak. imm. 2, oqaaseqatigiit aappaat, aamma
- 4) ilaqutariinnik inissami naapertuuttumi inissiisoqarnera uppersarsasoqarsinnaappat.

Imm. 2. Ilinniarneq imaluunniit ilinniarfimmiiinneq qaammatit qulit inorlugit sivilissuseqarpat, meeqqat

angalanermut akiliunneqarsinnaanngillat. Ilinniagaqarnersiuteqarnermut Naalakkersuisoqarfik qinnuteqartoqareerneratigut pissutsillu immikkut illuinnartut atuutsillugit tamatuma sanioqqunneqarnissaanik akuersissuteqarsinnaavoq, tamatumunnga ilanngullugit meeqqap ukiuisa (0-imiit 6-imut), ineqarnermi atugarisat meeqqallu paarineqarnissaanut periarfissat tamanna tapersernartippassuk.

Imm. 3. Ilinniagaqartup aapparisa, tak. § 6, angalanermut akiliunneqassaaq meeqqat akiliunneqarlutik angalanissaat imm. 1 najoqqutaralugu akuerineqarsimappat.

Imm. 4. Ilinniagaqarnerup naammassineranut, unitsinneqarneranut imaluunniit unitsikkallarnerneranut atatillugu, meeqqat akiliunneqarlutik angalanissamut akuerisaasimasut ilinniarnerrullu naammassinerani unitsinneraniluunniit 18-inik ukioqalereersimasut, akiliunneqassapput.

§ 38. Naartunermi ernereernermilu ilinniarnerpup unitsikkallarnerani ilinniagaqartup ilaqutaasa qaninnerit najugaqarfianut siumut utimullu Kalaallit Nunaanni akiliunneqarluni angalasoqarsinnaavoq, tak. § 7.

§ 39. Ukiup ilinniarfusup iluani sulinngiffeqarnermut atatillugu angalanermut akiliutsittoqarsinnaavoq, illoqarfup ilinniarfigisap aamma Kalaallit Nunaanni nammineq qitornat aalajangersimasumik najugaqarfia akornanni siumut utimullu angalaneq imaluunniit ilinniagaqartup imaluunniit ilinniagaqartup angajoqqaavisa toqukkut qimagussimanngitsut Kalaallit Nunaanni aalajangersimasumik najugaqarfianut siumut utimullu angalaneq, ilinniagaqartoq ilinniarnerpup aallartinnerani akiliunneqarluni angalanissaminut akuerisaasimappat, taamaattoq tak. imm. 2 aamma 3. Akiliunneqarluni angalasinnaatitaaneq atuutissanngilaq, ilinniagaq qaammatit 12-it iluanni naammassineqassappat. Utimut angalaneq kingusinnerpaamik pissaaq ilinniakkami semesterip aallartinnerani.

Imm. 2. Akiliunneqarluni angalasinnaatitaaneq ilinniakkat nikinneranni attatiinnarneqassaaq, allamik ilinniagaqalernerup ilinniarfigileqqaakkap unitsinneraniit naammassineraniilluunniit qaammatit 15-it iluanni pisimappat, ilinnialeqqaakkamullu atatillugu akiliunneqarluni angalanissaaq akuerineqarsimappat. Tamanna atuutissanngilaq ilinniagaq qaammatit 12-it iluanni naammassissappat.

Imm. 3. Akiliunneqarluni angalasoqarsinnaavoq, ilinniarnerpup aallartinnerani akiliunneqarluni angalanissaaq akuerineqarsimanngikkaluarpalluunniit, tak. imm. 1, naggat siulleq, makku uppersarsineqarsinnaappata:

- 1) Kalaallit Nunaanni aalajangersimasumik najugaqarfisamit kingullermit nuunneq, ilinniagaqartoq suli 18-inik ukioqalersinnagu pisimasooq,
- 2) nuunnermut ilinniarnermi paaqqutarineqarnermiluunniit pissutsit tunngaviuppata,
- 3) nuunneq aapparisa, tak. § 6, Kalaallit Nunaata avataani ilinniarnernik peqquteqarpat, tassungalu atatillugu aapparisaq akiliunneqarluni angalanissaminik akuerisaasimappat, imaluunniit
- 4) ilinniagaqartoq akiliunneqarluni illoqarfimmut ilinniarfusumut angalasimaguni ilinniakkap aallartinneranut atatillugu, aammalu ilinniarnerpup naammassineraniit unitsinneraniilluunniit qaammatit 3-t iluanni illoqarfimmi ilinniagaqarfisamini ilinniakkamik nutaamik aallartitsisimaguni.

Imm. 4. Imm. 1 aamma 2 naapertorlugit akiliunneqarluni angalaneq siusinnerpaamik pisinnaavoq ilinniarnerpup aallartinneraniit qaammatit 9 qaangiunneranni. Ilinniagaq piffissami 1. novemberimiit 31. januaarimi aallartinneqarsimappat, akiliunneqarluni angalaneq siusinnerpaamik pisinnaavoq ilinniarnerpup aallartinneraniit qaammatit 5 qaangiunneranni.

Imm. 5. Imm. 1 naapertorlugu akiliunneqarluni angalaneq Kalaallit Nunaanni sumiiffimmut allamut pisinnaavoq, angalanermut aningaasartuutit aalajangersimasumik najugaqarfimmut kingullermut angalanissamit akisunerunngippat.

Imm. 6. Imm. 1 aamma 2 naapertorlugit siumut utimullu angalaneq akilernerqassaaq qitornanut 18-it inorlugit ukiulinnut ilinniartumi najugaqartunut, ilinniartullu pilersuisutut pisussaaffigisaanut.

Imm. 7. Bilitsit angalanissaq kingusinnerpaamik sapaatip-akunneri sisamat sioqqullugit inniminnerneqassapput. Kingusinnerusukkut inniminniinermi aningaasartuutit annertuseriaatigisinnaasaat matussuserneqassanngillat.

§ 40. Ilinniagaqartut ilinniaqqinnissamut piareersaataasumik ilinniarnermik, ilinniarnertuunngorniarluni ilassutitut ilinniarnermik imaluunniit bacheloritut ilinniarnermik naammassineranut atatillugu Kalaallit Nunaanni aalajangersimasumik kingullertut angerlarsimaffigisamut akiliunneqarlutik angalasinnaatitaasut, tak. § 35, imm. 2, aamma Kalaallit Nunaanni aalajangersimasumik kingullertut angerlarsimaffigisap illoqarfimmut ilinniarfusumut naleqqiullugu timmisartoqarfup, umiarsualiviup imaluunniit qimuttuitsut unittarfata qaninnerpaap akornanni angalanermut akiliunneqarsinnaatitaasut, ilinniarnerminnik naammassisaminnut atatillugu ilinniarnermik nutaamik ingerlaqqillutik sivitsuisut, tak. § 35, imm. 1, naggatit aappaat, angalanernik pineqartunik nuussisinnaapput, § 39, malillugu siumut utimullu angalanissanngorlugu.

Imm. 2. Nuussinnermik nalunaaruteqartoqassaaq, tak. imm. 1, siumut-utimullu angalanissaq kingusinnerpaamik qaammatinik pingasunik sioqqullugu.

§ 41. Ilinniagaqartumut, qitornanut najugaqatiginngisaminut angajoqqaatut oqartussaassuseqartumut, meeqqat arlaata Kalaallit Nunaanni najugaata aalajangersimasup illoqarfiullu ilinniarfigisap akornanni juallimut siumut utimullu angalatitsisoqarsinnaavoq. Tamannali atuutissanngilaq ilinniagaqartup meeraq ilinniagaqarfusumut ukiumi ilinniarfusumi tassani ilagisimappagu, imaluunniit ilinniagaqartup ilinniarnini qaammatisiutit malillugit ukiup tulliani 1. marts nallertinnagu naammassinissaa ilimagineqarpat.

Imm. 2. Meeqqat, aappaasoq pinnagu, tak. § 6, illoqarfimmut ilinniarfigisamut ilagineqarsimappata, ilinniagaqartoq meeqqallu siumut utimullu angalanissamut akiliunneqassapput, aappaasoq aamma meeqqat ilaannut minnerpaamik ataatsimut angajoqqaatut oqartussaassuseqarpat. Illoqarfup ilinniarfigisap aammalu aappaasup aalajangersimasumik Kalaallit Nunaanni najugaata akornanni siumut utimullu angalanermut akiliussisoqassaaq.

Imm. 3. Illoqarfik ilinniarfigisap Kalaallit Nunaanniippat, imm. 2 malillugu angalanermut taarsiullugu, aappaasoq meeqqallu ilinniartup angajoqqaatut oqartussaaffigisai, illoqarfimmut ilinniarfigisamut siumut utimullu angalanissamut akiliunneqarsinnaapput. Imm. 2 naapertorlugu angalanermut akiliunneqarsinnaasumut naleqqiullugu aningaasartuutit annertuseriaatigisinnaasaat matussuserneqassanngillat.

Imm. 4. Illoqarfik ilinniarfigisap Kalaallit Nunaata avataaniippat, tassunga Danmarki ilanngullugu, imm. 2 malillugu angalanermut taarsiullugu, aappaasoq, tak. § 6, meeqqallu ilinniartup angajoqqaatut oqartussaaffigisai, illoqarfimmut ilinniarfigisamut siumut utimullu angalanissamut akiliunneqarsinnaapput, ilinniagaqarnermi pissutsit immikkut ittut tassani atuuppata, tassunga ilanngullugit soraarummeernerit aamma immikkut sammisamik suliaqarneq. Imm. 2 naapertorlugu angalanermut akiliunneqarsinnaasumut naleqqiullugu aningaasartuutit annertunerulersimappata matussuserneqassanngillat.

Imm. 5. Illoqarfimmi ilinniarfimmiiinneq qaammatinik qulinik sivikinneruppat imm. 1-4 malillugit angalanermut akiliussisoqarsinnaangilaq.

Imm. 6. Bilitsit aallarnissaq kingusinnerpaamik sapaatip-akunnerinik sisamanik sioqqullugu inniminnerneqassapput. Kingusinnerusukkut inniminniisoqarneratigut aningaasartuutaanerusinnaasut matussuserneqassanngillat.

§ 42. Ilinniarfimmit imaluunniit aqutissiuusumit inassuteqartoqareerneratigut qinnuteqartoqareerneratigullu ilinniagaqarnersiuteqarnermut Naalakkersuisoqarfik, ilinniagaqartumik ilinniagaqarnersiuteqartitsisinnaavoq, tamatumunnga ilanngullugit angalanermut aningaasartuutit pisariaqartut tamakkiisumik matussusernissaat aamma pisariaqartumik akunninnerni aningaasartuutitut tapiissutit, tak. imm. 2-5 makkununga atatillugu:

- 1) pinngitsoorani suliaasanut ilutsit ungasissumiit atuartitsinerni,
- 2) ingerlaqqiffiusumik ilinniakkani immikkut pinngitsoorani suliaasat suliaassallu pingaarnerit, pinngitsoorani ilinniakkap aaqqissugaanerani nalunaarsorneqartut suliarinerat imaluunniit immikkut suliaq suliarluunniit pingaarneq ilinniakkamut pineqartumut naleqqiullugu immikkut naleqartinneqarpat,
- 3) ilinniakkamut naapertuuttumik sungiusarluni sulinerit qaammat ataaseq sinnerlugu sivilussuseqartut,
- 4) ilinniakkamut naapertuuttumik ilinniarfimmi allamiinnerit qaammat ataaseq sinnerlugu sivilussuseqartut, ilinniarfimmilu allamiinnissaq ilinniakkami pinngitsoorani piumasaappat ilinniakkallu aaqqissugaanerani nalunaarsorneqarsimappat imaluunniit ilinniakkamut pineqartumut naleqqiullugu immikkut naleqartinneqarpat,
- 5) pinngitsoorani ilinnialernissamut misilitsinnerit, aamma
- 6) sakkutuussatut misilitsinnerit.

Imm. 2. Kalaallit Nunaanni Kalaallilu Nunaata avataani ilinniarfimmiiinnermi aningaasartuutitut pisariaqartunut tapiissutit aalajangerneqassapput, ilinniarfimmiiinnermi qaammammut aningaasartuutitut procentinngorlugit, taamaattoq annerpaamik qaammammut 10.000 kr-nit taamaallilluni ilinniarfimmiiinnermi

- 1) kr. 4000 tikillugit aningaasartuutit 100%-imik matuneqassallutik aamma,
- 2) kr. 4000 sinnerlugit aningaasartuutit 75%-imik matuneqassallutik.

Imm. 3. Imm. 1-imi 2-milu aningaasartuutit taaneqartut tamarmik pisariaqartutut uppersarneqarsimassapput ilitersuisumillu siumut akuerineqarsimassallutik. Imm. 1, nr. 1-imi eqqaaneqartut pissutsit eqqaassanngikkaanni tapiissutit annertunerpaamik semesterimut ataatsimut tapiissutigineqartassapput. Imm. 1, nr. 2-imi taaneqartut eqqaassanngikkaanni, ilinniarnermi taamaallaat ataasiaannarluni tapiisoqassaaq.

Imm. 4. Angalanermut aningaasartuutitut pisariaqartunut matussusiineq aamma tapiissutit pisariaqartumik unnuinernut aningaasartuutitut imm. 1, nr. 1 naapertorlugu, annertunerpaamik ukiumi atuarfiusumi pingasoriarluni akilerneqarsinnaapput. Ilinniartitaanersiuteqarnermut Naalakkersuisoqarfik tassanngaaniit immikkut akuersissuteqarsinnaavoq, pissutsit immikkut illuinnartut tamanna tungavissaqartippassuk.

Imm. 5. Angalaneq taamaaliortoqarsinnaappat ukiumoortumik ilinniagaqannginnermi angalanermut atatillugu inissinneqassaaq, tak. § 39.

Imm. 6. Paasisassarsiorluni angalanernut paasisassarsiornernullu tapiisoqarsinnaangilaq.

§ 43. Ilinniagaqartup qanigisaani napparsimaruluttoqartillugu toqusoqartilluguluunniit, tak. § 7, ilinniagaqartumut taassumalu meeraanut, taakku ilinniagaqartumi najugaqarpata, angalanermut aningaasartuutit allanit matuneqarsimatinnagit akiliussilluni angalatitsisoqassaaq. Akiliussilluni angalatitsisoqassaaq illoqarfup ilinniarfusup qaniginerpaasallu pineqartup najugaata akornanni siumut utimullu angalanertut.

Imm. 2. Napparsimaruloornerup kingunerisaanik toqusoqartillugu, tamatumunngalu atatillugu ilinniagaqartup akiliunneqarluni angalanissamik akuersissuteqarfigineqarfigisaani, ilinniagaqartoq Kalaallit Nunaanni ilisinissamut akiliunneqarluni angalasinnaatitaavoq, tamanna najugarisap avataani pissappat, aammalu illoqarfimmut ilinniagaqarfigisamut uteqqinnermut.

Imm. 3. Aallarnissaq sioqqullugu nakorsap nalunaarutaatigut uppersarsarneqassaaq nappaat ima peruluutaatigisoq ilaqaatasut pisarnertut aggersarneqarlutik. Toqusoqarnera toqusup toquneranik uppersarsaatitut allagartap assigisaataluunniit nuutinneranik uppersarsarneqassaaq.

Imm. 4. Ilinniagaqartoq toquppat, ilaquuttat qaninnerit najugaqarfiannut toqusup angallanneqarnera akilerneqassaaq. Angallassinermut ilaapput toqusumik Kalaallit Nunaannut angallassinermi aningaasartuutit pisariaqartut pisortanit piumasaqaatinik tunngaveqartut tamakkerlugit.

Pisattanik assartuisarneq

§ 44. Pisattanik assartuinnermut akiliussisoqarsinnaavoq, tak. imm. 2, nr. 2-4, ilinniagaqarnerup aallartinneranut, unitsinneranut imaluunniit naammassinernut atatillugu angalanermut akiliussisoqarnissaa akuersissutigineqarsimagaangat, taamaattoq tak. § 37, imm. 1, oqaaseqatigiit aappaat,

Imm. 2. Pisattanik assartuinnermut akiliussisoqarsinnaavoq:

- 1) ilinniagaqartunut qaammatit arfinillit sinnerlugit ilinniarfimiittussanut imaluunniit sungiusarlutik suliffimiittussanut, meeqqat akiliunneqarlutik angalanissaat akuersissutigineqarsimagaangat,
- 2) ilinniagaqartunut aappariinnut angalaqatigiittunut, tak. § 6, ilinniarnissaq qaammatinik 20-nik sivilisinerusussatut naatsorsuutigineqarpat,
- 3) qaammatinit 20-nit sivilisinerusumik ataannartumik ilinniareerluni angerlarnermut atatillugu, imaluunniit
- 4) pisattat ornigassamut angallanneqarnerannut akiliussisoqarsimatillugu, takukkit nr. 2 aamma 3.

Imm. 3. Ilinniagaqarnermik unitsitsisoqarallartillugu, tassunga ilanngullugit ilinniagaqarnermik unitsitsigallarneq, pisattanik assartuinnermut akiliussisoqarsinnaanngilaq.

Imm. 4. Ilinniagaqartunut Nunat Avannarliit avataanni ilinniagaqarnermi ilinniagaqarnerisuteqarnissamik akuerineqartunut pisattanik assartuinnermut akiliussisoqarsinnaanngilaq.

§ 45. Pisattanik assartuineq umiarsuakkut nassiussinertut pissaaq, tassaassallunilu containeri mikisoq ataaseq, imaluunniit ataasiakkaanik nassiussatut 5,5 m³ tikillugit initussusillittut nassiussat, nassiussinermullu ataatsimut 100.000 kr. angullugit sillimaserneqassalluni.

Imm. 2. Pisuni immikkut ittuni umiarsuartigut angallassinissaq ajornarallartillugu toqqortarinnikkallartitsinnermut aningaasartuutitik matussusiisoqarsinnaavoq.

Imm. 3. Ilinniagaqartut Kalaallit Nunaaliartut Kalaallit Nunaanneersulluunniit pisataannik angallassineq akilerneqaraangat, poortuinnermut puuiaanermullu aningaasaliineq ilanngunneqartarpoq.

Imm. 4. Ilinniagaqartut aappariit, tak. § 6, assigiimmik angallaveqartussat annerpaamik containerimut

mikisumut ataatsimut nassiussanulluunniit 5,5 m³-isut initutigisunut akiliunneqarsinnaapput. Aappariit tamarmik ilinniakkani tamarmik immikkut qaammatit 20-t sinnerlugit sivilissuseqartuni ilinniagaqarsimappata, containerit mikisut marluk imaluunniit nassiussat katillugit 11 m³-isut initutigisut akilerneqarsinnaapput.

Imm. 5. Ilinniagaqartut pingasunik amerlanernilluunniit meeraqartut annerpaamik containerit mikisut marluk imaluunniit nassiussanut katillugit 11 m³-isut initussuseqartunut akiliunneqarsinnaapput.

§ 46. Nassatanik akiliussisoqartillugu, taamaattoorli umiarsuartigut assartuinissaq ajornarallartillugu, angalanermut akiliunneqartumut ataatsimut naammaginnartumik uppersaasiinikkut ilinniarnernup aallartinnerani, unitsinnerani naammassineraniluunniit timmisartukkut nassatanut 10 kg angullugu oqimaappallaarutaasunut aningaasartuutit utertinneqarsinnaapput.

§ 47. Pisattanik assartuinnermut akiliussisoqassanngilaq, ilinniagaqartoq suliffimmini suliunnaarluni imaluunniit suliffissamini sulilissalluni sulisitsisup akiligassarisaanik pigisanik angallassissappat.

Illassutitut ilinniartinneqarneq aamma katsorsartinnermut aningaasartuutit

§ 48. Ilinniarfimmi ilitsersuisumit inassuteqartoqareerneratigut, kalaallit oqaasiinik allamiullu oqaasiinik pisariaqartunik ilinniartitsinnermut peqataanermut aningaasartuutit tamakkiisumik matussuserneqassapput.

Imm. 2. Ilinniarfimmi ilitsersuisumit inassuteqartoqareerneratigut ilinniakkami ilinniartitsissummi pisariaqartumik immikkut ilinniartinneqarnermut aningaasartuutit tamakkiisumik matussuserneqassapput. Illassutitut ilinniartitsinnermi ilikkagassani nal. ak. ilinniartitsiviusussat sinnerlugit ilinniartitsineq sivilissuseqarsinnaanngilaq. Ilinniakkami ataatsimi immikkut semesterimi ilinniartinneqarnermut ataatsimut tapiisoqarsinnaavoq.

§ 49. Kalaallit Nunaata avataani, tassunga Danmarki ilanngullugu, ilinniagaqartut nakorsamit uppersaaserneqartumik anigorsinnaanngisaminnik nappaateqaraangata nakorsamit innersuunneqartunik nakorsaatinut aningaasartuutaat matussuserneqassapput.

Imm. 2. Kalaallit Nunaata avataani, ilanngullugu Danmarkimi, ilinniagaqartut nakorsamit innersuunneqartumik katsorsarneqarnermut piffissami nakorsap innersuussaani aningaasartuutaat matussuserneqassapput.

Imm. 3. Kalaallit Nunaata avataani ilinniagaqartut, ilanngullugu Danmarkimi, pisariaqartumik kigutiniq suliarititsisariaqaleriataarneranni aningaasartuutitut tamakkiisumik matussusiisoqartassaaq, suliaritinneq Ilinniagaqarnerisuteqarnermut Naalakkersuisoqarfimmit akuerineqarpat.

Imm. 4. Imm. 1-3 naapertorlugit aningaasartuutit taamaallaat pisortanit allanit imaluunniit sillimmasiinnikkut aqqissuussinnernit matussuserneqanngitsut akilerneqassapput.

Imm. 5. Imm. 1-imi aalajangersakkami aamma ilaapput ilinniagaqartup nammineq meeraq, ilinniagaqartumi najugaqartut.

Atuakkanut aningaasartuutitut tapiissutit

§ 50. Ingerlaqqiffiusumik ilinniagaqartunut, semesterit aallartinneranni kr. 1100-nik tapiisoqartassaaq, atuakkat ilinniarnermi pinngitsoorani atugassat, atortussat ataatsimoortut, atuagassat katitikkat assigisaasalu pisiarinissaannut tapiissutitut.

Kapitali 7

Ilinniarnermi taarsigassarsiat nunatta karsianit aningaasalersorneqartut

§ 51. Tapiiffigineqarsinnaasunik ingerlaqqiffiusumik ilinniagaqartunut, kapitali 2-mi aamma 4-mi piumasaaqatinik piviusunngortitsinnaasunut, 18-inillu ukioqalereersimasunut, ilinniarnermi taarsigassarsititsisoqarsinnaavoq. Taarsigassarsineq ilinniarnermi ataasiaannarluni taarsigassarsinertut pissaaq, ukiup affakkaartumik semesterimut taarsigassarsiatut, taamaattoq tak. §§ 52, 53 aamma § 34, imm. 2, aamma ilinniarnermut akiliutinut taarsigassarsiatut, tak. § 14, imm. 2. Ataasiaannarluni taarsigassarsiat aamma ukiumut taarsigassarsiarisinnaasat annerpaaffissaasa annertussusaat aningaasanut inatsimmi ersipput.

Imm. 2. Semesterimut taarsigassarsiat upernaakkut semesterimut ukiakkullu semesterimut taarsigassarsiaritineqartarput. Tassunga atatillugu upernaakkut semesteri tassaatinneqarpoq 1. januaarimiit 31. juli ilanngullugu, ukiakkullu semesteri tassaatinneqarluni 1. augustimiit 31. december ilanngullugu. Semesterimut taarsigassarsiat semesterip pineqartup naanerani tamakkiisumik atorineqarsimanngitsut, semesterip tullianut nuunneqarsinnaapput.

Imm. 3. Ataasiaannartumik allanik taarsigassarsisitsisoqaqqissinnaavoq, pissutsit immikkut illuinnartut pissutaatillugit, ilinniakkap allamik taarserneratigut imaluunniit ilinniakkamik allamik aallartitsineri, tamatumani ilaallutik nuunnermut aningaasartuutigisanut aammalu inissiamut nutaamut qularnaveeqqutitut akiliutit.

Imm. 4. Ilinniagaqarnermi taarsigassarsisoqassaaq akiitsunut allagartaliussaq ilinniagaqarnermiuteqarnermut Naalakkersuisoqarfimmit akuerineqartoq atorlugu. Ilinniagaqarnermi taarsigassarsiat siusinnerpaamik tunniunneqarsinnaapput, ilinniagaqarneq aallartinneqareerpat akiitsunullu allagartaq atsiorneqarnikoq ilinniagaqarnermiuteqarnermut Naalakkersuisoqarfimmit tiguneqareerpat.

§ 52. Ilinniakkat 1. marts imaluunniit 1. oktober sioqqullugit naammassineqartut semesterimi pineqartumi taarsigassarsinissamut pisinnaatitaaffigineqanngillat. Naalagaaffiup ilinniagaqarnermiuteqartitsineranit ilinniagaqarnermiuteqartunut semesterimut taarsigassarsianik tapiissuteqartoqarsinnaanngilaq, taamaattoq tak. § 34, imm. 2.

§ 53. Ilinniagaqartunut ilinnialernissamut piareersaataasumik ilinniagaqartunut, inuutissarsiummik ilinniagaqartunut imaluunniit naatsumik inuussutissarsiutinut ilinniagaqartunut ilinniarnermi taarsigassarsisitsisoqarsinnaanngilaq, taamaattoq tak. imm. 3 aamma § 34, imm. 2, oqaaseqatigiit aappaat.

Imm. 2. Ilinniagaqartunut ilinniarnermi taarsigassarsisitsisoqarsinnaanngilaq ilinniareernerup kingorna ilinniagaqarnermi akiitsugarilikkat ima amerlatigilersimassappata taarsersornissaat ajornartorsiutaalertussatut nalilerneqarluni. Naliliineri makku mianerineqassapput:

- 1) akiitsut annertussusaat ilinniareernermi isertitassatut ilimagisanut naleqqiullugit,
- 2) ilinniagaqartup ilinniarnermi taarsigassarsiaminik naafferartumik akilersuinissaata qanoq

sivisutiginissaata ilimagineqarnera.

3) ilinniagaqarnermi taarsigassarsiat pillugit naafferartumik akilersuineramik aqqissuussineramik ilinniagaqartoq siusinnerusukkut ingasattumik ilaginnaasimanersoq.

Imm. 3. Ilinniagaqartunut ilinnialernissamut piareersaataasumik ilinniartunut, inuutissarsiummik ilinniartunut imaluunniit naatsumik inuussutissarsiutinut ilinniagaqartunut 18-inillu ukioqalereersimasunut ataasiaannakkamik taarsigassarsititsisoqarsinnaavoq.

Kapitali 8

Allaffissorneq

§ 54. Kalaallit Nunaanni ilinniakkamut peqataanermi ilinniagaqarnerisiaqarumalluni qinnuteqaat, qinnuteqarnermi immersugassaq ilinniagaqarner siuteqarnermut Naalakkersuisoqarfimmit akuerineqartoq atorlugu nassiunneqassaaq. Ilinniagaqarner siuteqarnermut Naalakkersuisoqarfiup ilinniagaqarner siutinik qinnuteqaatit suliarinissaannut periusissat aalajangersassavai, tamanullu saqqummiullugit.

Imm. 2. Immikkut akuerineqarnissamik qinnuteqaatit ilinniagaqarner siuteqarnermut Naalakkersuisoqarfimmut nassiunneqassapput.

Imm. 3. Ilinniagaqarner siuteqarnermut Naalakkersuisoqarfiup ilinniagaqarner sianik qinnuteqaateqarnissamut ullussaliussat aalajangersarsinnaavai.

Imm. 4. Ilinniagaqarner siuteqarnissamut qinnuteqaatit Majoriami ilinniakkamik ingerlatsiner mi kommunabestyrelsimi t allaffissornikkut aqunneqarput, naammassisassanut isumaqatigiissummik tunngaveqartumik, Namminersorlutik Oqartussat aamma kommunaleb styrelsi akornanni isumaqatigiissutaasoq tunngavigalugu.

Imm. 5. Ilinniagaqarner siuteqarnermut Naalakkersuisoqarfiup ukiut tamaasa Majoriami ilinniagaqarsinnaasut amerlassusissaat aalajangertarpaa. Ukiumut tulluuttumut annertussusissat kommunalbestyrelsimut oktobari naatinagu nalunaarutigineqartassaaq.

Imm. 6. Kommunalbestyrelse qinnuteqaatinut imm. 4-mi pineqartunut aalajangiisassaaq. Ilinniagaqarner siutit kommunalbestyrelsimi akilerneqassapput, kingornagullu akiliutit Ilinniagaqarner siuteqarnermut Naalakkersuisoqarfimmut akiligassiisutigineqassallutik.

Imm. 7. Kommunalbestyrelsi ilinniagaqarner siutit pillugit imm. 6 naapertorlugu aalajangiinera allaffissornikkut oqartussanut allanut suliaassanngortinneqarsinnaanngilaq.

§ 55. Ilinniagaqartup ukiuni ilinniagaqarner siuteqartitsiviusartuni tamani qaammammi arlalinniluunniit ilinniagaqarner siuteqannginnissaq toqqarsinnaavaa. Ilinniagaqarner siuteqarnissamik qinnuteqannginneq ilinniagaqarner siuteqannginnissamik toqqaanermut sanilliunneqassaaq. Ilinniagaqartoq qaammatini qassini ilinniagaqarner siuteqannginnissamik nalunaaruteqarani ilinniagaqarner siuteqannginnissaq toqqarpagu, tamassuminnga nutaamik allaganngorlugu qinnuteqarnissaq ilinniagaqarner siutit akileqqittalernissaannut piumasaqaataavoq.

Imm. 2. Ilinniagaqarner siuteqannginnissamik allaganngorlugu qinnuteqaat, qaammatip akiliiffusussap 15-ianni ilitersuisup tigoreersimassavaa. Ilinniagaqarner siutit akilerneqartarnerisa aallarteqqinneqarnissaat pillugu qinnuteqaat, qaammatip akiliiffusussap 15-ianni ilitersuisup tigoreersimassavaa.

Kapitali 9

Atuutilersitsinermut, ikaarsaariarnermut atorunnaarsitsinermullu aalajangersakkat

§ 56. Nalunaarut 1. august 2017 atuutilerpoq.

Imm. 2. Tassunga peqatigitillugu Ilinniagaqarnersiutit pillugit Namminersornerullutik Oqartussat nalunaarutaat nr. 28, 25. november 2016-imeersoq atorunnaarsinneqarpoq.

§ 57. Ilinniagaqartut 1. august 2017 sioqqullugu ingerlaqqiffiusumik ilinniakkamik naammassisaqarsimasut, Namminersorlutik Oqartussanit ilinniagaqarnersiuteqarlutik imaluunniit Naalagaaffiup Ilinniagaqarnersiuteqartitsivianiit - Statens Uddannelsesstøtte – ilinniagaqarnersiuteqarlutik qiorsinernik ilanngaavigineqassapput tapiissutitut naapertuuttunik.

Imm. 2. Ilinniagaqartut ingerlaqqiffiusumik ilinniakkamik piffissami 1. august 2005 aamma 1. august 2017-ip akornanni ilinniakkaminnik taamaatitsisimasut Namminersorlutik Oqartussaniit ilinniagaqarnersiuteqarfiusumik, qiorsinernik tapiissutitut naapertuuttunik ilanngaavigineqassapput.

§ 58. Ilinniagaqartut 1. august 2005 sioqqullugu Namminersorlutik Oqartussanit ilinniagaqarnersiuteqarlutik ingerlaqqiffiusumik ilinniakkamik naammassinnissimasut, ilinniakkamik kingulliup naammassisap sivilsussusissaatut aalajangiussap nalinganik qiortakkanut killissarititami ilanngaanneqassapput. Ilinniagaqarneq bachelorinnngornissamut aamma kandidatinngornissamut immikkoortoqartoq ilinniagaqarnertut ataatsitut matumani isigineqassaaq. Ilinniagaqartoq Namminersornerullutik Oqartussanit ilinniagaqarnersiuteqarluni 1. august 2005-imi ingerlaqqiffiusumik ilinniakkamik nutaamik ingerlatsisimaguni, ilinniakkamut naammassisamut killissarititami qiortakkanik ilanngaavigineqassanngilaq.

Imm. 2. Ilinniagaqartut Namminersornerullutik Oqartussanit ilinniagaqarnersiuteqarlutik 1. august 2005 sioqqullugu ingerlaqqiffiusumik ilinniagaqarnermik unitsitsisimasut killissarititami qiortakkanik ilanngaavigineqassanngillat. Ingerlaqqiffiusumik ilinniagaqartoq 1. august 2005-imi kingusinnerusukkulluunniit aallartitaanut naleqqiullugu ilinniakkami unitsissimasamini piginnaaffeqarfinnik pissarsisimappat, ilinniakkap aallartinnerani piffissami tapiissuteqarfiusumi killissarititamilu qiortakkanik ilinniakkami pineqartumi piginnaaffeqarfinnik pissarsiffiusunut qaammatitut aalajangersimasunut ilanngaasoqassaaq.

Imm. 3. Ilinniagaqartut Namminersornerullutik Oqartussanit ilinniagaqarnersiuteqarlutik 1. august 2005-imi ingerlaqqiffiusumik ilinniagaqartuusut killissarititami ilinniakkap maannakkut inissisimaffiani ilinniarfiginissaanik sivilsussusiata assinganik qiortakkanik ilanngaavigineqassapput. Ilinniagaqarneq bachelorinnngornissamut aamma kandidatinngornissamut immikkoortoqartoq ilinniagaqarnertut ataatsitut matumani isigineqassaaq. Tamanna ilutigalugu ilinniakkami ingerlanneqartumi piffissaq tapisiaqartitsiviusoq sivilsorneqassaaq, aningaasanik tapisiaqartitsiviusup ilinniagaqarnerullu sivilsussutsimikkut inissisimaffisa akornanni qaammatit amerlassusiisa assigiinngissutaannik qiugassat amerlassusilerlugit.

§ 59. Ilinniagaqartunut tapiiffigineqarsinnaasunut 1. januar 2013 sioqqullugu tapiiffigineqarsinnaasumik ingerlaqqiffiusumik ilinniakkamik Danmarkimi aallartitsisimasunut, aammalu 1. januar 2013-ip kingorna

suli ilinniakkaminnik kipitinnagu ingerlatsisunut, stipendianik tunniussisoqarsinnaavoq, tak. § 12, danskit ilinniagaqarnersiuteqarnermut malittarisassaasat naapertorlugit qiortakkat nungussimagunikkit. Piumasaqaatit § 13-imiittut naammassineqarsimappata ilutigisaanik meeqqanut tapisianik pisartagaqartitsisoqarsinnaavoq.

Imm. 2. Imm. 1 malillugu stipendiat meeqqanullu tapit annerpaamik qaammatinut aqqaneq marlunnut tunniunneqarsinnaapput.

Imm. 3. Ilinniagaqartunut ilinniagaqarnersiuteqarsinnaasunut, 1. januar 2013 sioqqullugu ingerlaqqiffiusumik ilinniakkamik tapiiffigineqarsinnaasumik Danmarkimi aallartitsisimasunut, aammalu 1. januar 2013-ip kingorna unitsinnagu ilinniakkaminnik suli ingerlatsisunut, ilitersuisumut qinnuteqarnermikkut ilassutitut qiortakkanik 12-inik pissarsisinnaapput, tak. § 26, ilinniagaqartoq peqqutit imaluunniit ilinniagaqartup qanigisaani peruluttoqarnera toqusoqarneraluunniit pissutigalugit ilinniarnermi kinguartoorsimappat, pissutsit § 26, imm. 1-imi pineqartut tunngavigalugit.

§ 60. Meeqqanut tapisiaqartitsisoqarsinnaavoq, tak. § 13, ilinniagaqartunut tapiiffigineqarsinnaasunut Danmarkimi najugaqartunut, 1. januar 2013-imi Naalagaaffiup ilinniagaqarnersiuteqarfianiit, stipendianik pisartagaqalertunut, ilinniagaqartoq pilersuisutut tapisianik danskit ilinniagaqarnersiuteqarnermut malittarisassaasat naapertorlugit tapisiaqarsinnaatitaanngippat.

Imm. 2. Ilinniagaqarnersiuteqarnermut Naalakkersuisoqarfik qinnuteqartoqarnera tunngavigalugu meeqqanut tapisiaqartitsisinnaavoq ilinniagaqarnersiuteqarnissamut pisinnaatitaasunut Danmarkimi ilinniagaqartunut. 1. januar 2013-imi Naalagaaffiup ilinniagaqarnersiuteqarfianiit, stipendianik pisartagaqalertunut, ilinniagaqartoq pilersuisutut tapinik, meeqqanut tapitut pisassaraluaminit annikinnerusunik pisinnaatitaappat, tak. § 13. Meeqqanut tapit annertussuserissavaat, pilersuisutut tapit ilinniagaqartullu meeqqanut tapitut pisassaraluisa nikingassutaat.

§ 61. Ilinniagaqartut tapiiffigineqarsinnaasut, 1. januar 2013 sioqqullugu ilinniakkamik tapiiffigineqarsinnaasumik Danmarkimi aallartitsisimasut, aammalu 1. januar 2013-ip kingorna unitsinnagu ilinniakkaminnik ingerlatsisut, Ilinniagaqarnersiuteqarnermut Naalakkersuisoqarfimmut qinnuteqarnermikkut ilassutitut ilinniagaqarnersiutinik Namminersorlutik Oqartussaniit tapiiffigineqarsinnaapput, ilinniagaqartup aningaasat ilinniarnermi tunniunneqartartunut danskit ilinniagaqarnersiuteqartitsinermit malittarisassaannut nuunnermi kingorna ajornerusumik pineqannginnissaa siunertaralugu.

Imm. 2. Ilinniagaqarnersiutit ilassutaasut, tak. imm. 1, annertussusaat taamaallaat tassaasinnaapput, ilinniagaqarnersiutit ilinniagaqartup danskit ilinniagaqarnersiuteqartitsinermit malittarisassaasat naapertorlugit pisinnaasaasa aamma ilinniagaqartup Namminersorlutik Oqartussanit stipendiaqaannarsimaguni pisinnaasaraluisa uppersarnerneqarsinnaasumik nikingassutaat.

§ 62. Aalajangersakkat maannamut atuuttut malillugit qularnaveeqqusiissuteqarnermi pisussaaffiit atuuffissamik naanissaata tungaanut atuutiinnassapput piumasarisaasut allanngortinnagit.

Imm. 2. Qularnaveeqqusiissuteqarnermi pisussaaffiit 1. januar 1997 sioqqullugu akilerneqartut aalajangersakkat maannamut atuuttut malillugit ernialersorneqassapput.

Imm. 3. Qularnaveeqqusiissuteqarnermi pisussaaffiit 1. januar 1997 kingoqqullugu akilerneqartut, akiliinerup kingorna ullormit aallartittumit ernialersorneqalissapput. Sukkulluunniit akiitsuusut

ukiumoortumik ernialersorneqassapput pisortat sukkulluunniit diskontoata 5%-imik ilasap angeqataanik ernialersorlugit. Ernialiineq ukiut tamaasa 31. december piffissamiluunniit ilinniagaqartup akiitsunik akiliinerani pisassaaq.

Namminersorlutik Oqartussat, ulloq 19. juli 2017

Doris J. Jensen

/

Lone Nukaaraq Møller

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut